

Rocco La Torre

Sapuri  
e ciauru  
di campagna

**Rocco La Torre**

**Sapuri  
e ciauru  
di campagna**

*Queste poesie, prelevate dal "dimenticatoio", ove erano assieme ad altre, ne vengono fuori per la cortese pressione di una persona amica, formando, senza pretese, una raccolta destinata a pochi amici che prendono ed apprezzano questo genere per la spontaneità del contenuto tratto dalla realtà e dalla fantasia ed inventiva ma sempre all'impronta e senza una particolare cura nella forma, cioè: "comu nisceru d'a troffa..." Dunque accontentarsi!... e... "sarvativilli picchi sunnu i primi e sarà facili chi sunnu puru... l'ultimi".*

*Se poi capitassero nelle mani di persone che non le gradiscono, niente paura; tutto fa brodo,... basta considerarlo uno scherzo di Carnevale 1986 (di buono o cattivo gusto) se non altro avrò fatto quello che, con tutto il suo talento, non fece il mio nonno omonimo.*

Trapani 9 Febbraio 1986

## AMICU JACU

Di li cosi di Ciona è prianneddu  
perciò stu crastu ci l'aiu a purtari  
a Jachinu pi farilu cuntentu  
ma no comu nisciu nto giornali:  
tutta precisa pi comu fu fatta  
ci portu la versioni originali.  
E pi na manu m'allisciu sta carta,  
doppu ancora pi farilu priari  
nsemmula ci ni dugnu na dicina  
anticchia tempu si lu può passari  
di sira mezzornu e di matina.  
E si tutta sta robba nun ci'abbasta  
ancora io cinn'aiu na trintina  
mi li tegnu sarvati nta na cascia  
pi dariccilli a cu ncontru prima  
di l'amici chi ancora ci piaci  
leggiri sti paroli fatti a rima:  
si tu mi dici chi ni vuoi mannati  
io ti ni portu nautra dozzina  
abbasta chi ti fai quattru risati.

## LI VIGNI DI PEPPI

Era ntavula misu chi mangiava  
na siritina cu tutt'a famigghia  
la musica lu ventu ni purtava  
di lu coru di rintra la villa;  
sennu agguriusa ferma nun ci stava  
si misi ncacaticchiu a picciridda  
a mia la cosa nun mi disturbava  
e partemu io, me muggieri e me figghia  
pi gustari sti musichi e sti balli  
a lu coru di l'Egadi davanti.  
Accussì a la finuta di mangiari  
ni misimu n'un postu a mezza via  
"tonchi tirichi tonchi" si sintia cantari  
lu spassu di me figghia si viria  
frattantu puru io m'addivirtia  
e mentri chi l'orchestra ia sunannu  
riminarimi lu stommacu sintia  
senza strumentu ia accumpagnannu  
sempri na nota sula mi niscia  
all'aria aperta senza fari dannu.  
Maravigghiatu di tutta st'abbunanza  
misi a pinzari soccu avia statu  
di rutuliarimi accussì la panza  
e li vigni ch'avia visitatu,  
mi ricurdai chi iennu in bicichetta  
ne zucchi carrichi m'avia firmatu  
la racina matura pi gustari  
e lu prodottu agriculu apprezzari.

Speciarmenti sta vota pi signali  
nta li vigni di Peppi a Viali  
sennu amicu un mi potti rifardari  
troppu rappi mi n'appi a mangiari  
di catarrattu bonu pi pistari  
e lu mustu si misi a fermentari.  
Lu malutempu sintia avvicinari  
li trona nun vulianu cessari  
la smossa ia sempri a ncarricari  
e truvannumi nta sta situazioni  
avia a pigghiari na risuluzioni.  
Fu tannu chi pi faricci un'elogiu  
chiamaru a lu maestru Bulgarella  
lu me carvuni era vagnatu ammoddu  
mi ficiru pinzari a "cacaredda"  
perciò mi la scuffai pagghiri ncasa  
pi prepararimi a lu timpurali  
comu na varca quannu trasi mportu  
p'abbrazzarimi strittu a lu rinali  
chi a lu bisognu mi dava cunortu.  
Soccu successi si può mmagginari  
a stu puntu pi scrupulu e decenza  
vi pozzu sulu diri in cunfidenza  
tutti i raggiuni avia di sospettari.  
Viautri chi amati la natura  
pinzati chi cu mangia catarrattu  
a veniri la sciolta unn'addimura  
e si sapiti u munnu com'è fattu  
circati la racina chidda dura  
di li zucchi di tavula, però a un pattu,  
vardativi di li cartucci a sali  
e pinzati a lu patruni puvireddu  
chi qualchi rappa s' 'a voli mangiari.  
Iddu ci 'ha travagghiattu tuttu l'annu  
perciò nun si può metteri a taliari

a cu fa beni e a cu ci fa dannu,  
siddu si metti a disposizioni  
nun può pinzari a cu si va lassannu  
anzi si detti la cumminazioni  
di farli scannuliari pi natr'annu  
ssi bacchittuna cu la bicichetta  
dunni passanu iddi nenti resta  
di tutti cosi iddi fannu ncetta  
fussi megghiu ciaccarici la testa.  
La vinnigna si metti avvicinari  
c'è Peppi sulu e un sapi comu fari  
vi fa agguriu di cogghiri racina?  
ora na manu ci l'aviti a dari  
doppu chi vi rinchistu la sacchina;  
allura tutti sutta a travagghiari  
chiddi chi aviti la carica bona  
e vardativi sempri...di li trona!

## MISTICAMENTI

Nta na iurnata niura e brurusa  
pi comu era lu celu accupatu  
isannu l'occhi a taliari supra  
paria lu Munnu persu e abbannunatu:  
ranfi di sulì cauri e lucenti  
di rintra un nuvuluni spirtusatu  
scinnianu iusu facennu presenti  
cu è chi fici tuttu lu criatu.  
L'occhju di Diu talia la genti  
e viri nterra soccu è chi succeri  
chi patiscinu tutti li nnuccenti  
pi napocu chi mettinu traggeri.  
Viautri latri sbannuti e briganti  
fausi tinti e malazioneri  
cu ogni tempu iti sempri avanti,  
però di quannu avi chi c'è Munnu  
a Chissu chi cumanna tutt'i Santi  
sempri a Iddu s'avìa dari cuntù.  
Trimati spallitteri e mmrugghiatu  
pi cu è chi soffri, pi cuè chi mori  
Iddu dda supra a tutti vi pirduna  
di li mpirugghi e di li malazioni  
di chiddu chi cca sutta si cummina  
pirduna sempri però a un pattu  
a cu va nchiesa e a cu si la fila  
ma chi si penti di lu mali fattu.



## LU CORI CANTA

Fattu lu munnu nasciu l'amuri  
pi cunsulari tutti li criaturi  
di li peni chi s'hannu a suppartari,  
sennu fatti di carni, pi campari.  
E nuddu scappa di sta cosa antica  
chi ti duna 'llirizza e pinzeri  
e t'assicuta pi tutta la vita  
ma nun si sapi mai quannu veni  
arriva sulu, non si fa chiamari,  
e nun si fa di nuddu cumannari.  
Quannu chi l'occhi toi sunnu attirati  
di na fimmina china di biddizzi  
già li toi sensi sunnu aggramagghiati  
e tu addiventi comu l'acidduzzi  
chi aspettanu di essiri saziati:  
nun c'è bisognu mancu di paroli  
idda ti ncanta puru chi nun voli  
o tu si vecchiu oppuru si picciottu  
di tia si nni può fari panicottu.  
Ci fu na fimmina cu l'occhi chiari  
mi trasiu nta lu sangu di li vini  
si la taliu mi sentu mancari  
sugnu ammaliatu quannu idda rriri,  
la penzu sempri di notti e di jornu  
dunni io vaiu mi veni dappressu,  
quannu di notti s'arricogghi in sonnu  
l'aiu a lu ciancu nta lu lettu stessu,  
si m'arruspigghiu la vaiu circannu

cu l'occhi aperti taliu lu scuru  
manu manuzza emu caminannu  
e n'attruvamu fermi nfacci a un muru  
di na strata...chi un spunta!!!  
Sta fimmina mi lassa stralunatu  
è duci chi mi 'mbriaca e chi mi smunta  
idda mi dici "ma tu si malatu"  
sugnu foddì è veru hai raggiuni  
c'è di nfuddiri sugnu abbramatu,  
mi sentu ardiri com'un tizzuni  
dintra di mia c'è lu focu addumatu:  
nun putiriti mai dari un vasuni  
e nun putiri mai essiri amatu!  
Ora tu parti e di mia vai luntanu  
si nun ti viu mi cercu di scurdari  
di st'amuri impossibili e arcanu,  
la luntananza lu sapissi fari?  
L'occhìu nun viri e porta riparu  
a lu cori chi batti duci e amaru?  
perciò ora mi fingiu indifferenti  
comu si tu pi mia nun fussi nenti,  
tu eri zita perciò arraggiunamu  
forti chi hai lu cori attaccatu  
a megghiu cosa è chi ni scurdamu.  
Io sulu in sonnu t'aiu pussiritu  
e mai mi pozzu essiri pintutu  
stu sonnu si vinissi scancellatu  
e m'arritiru comu vastuniatu  
cu speranza chi fussi perdunatu  
ci l'abbanniu a tuttu lu Criatu:  
"quannu lu cori canta unn'è piccatu".

## MUSA RIFARDA

Durmivi giustu giustu cincu uri  
e all'alba mi susivi matineri  
circannu pi muntagni e pi chianuri  
firriannu pi timpuna e pi custeri  
pi putiri ncuntrari la me musa  
pi voscura, viola e pi trazzeri  
dunni putia essiri cunfusa,  
nun sacciu cchiù come l'aiu a truvari  
addummisciuta sbissata o mpazzuta.  
Tutti li cosi li pigghia leggèri  
dormi e nun si ni fa nudda primura  
a buliu si pigghia li pinzeri  
tanticchia p'a testa tanticchia p'a cura.  
Quannu la vitti e la misi a ciarari  
mi la pigghiai cu tantu piaciri  
pi idda nun sapia cchiù chi fari  
ma idda nun mi penza e nun mi viri  
parissi chi mi voli abbannunari,  
siddu si penti e mi lu fa capiri  
accussì veru mi ni fa stuffari.  
Mischinu soccu m'appi a capitari  
chi sorti nfami chi ci appi a tuccari  
a un'omu già cu li capiddi bianchi  
ch'avìa nisciutu di centu battagli.  
Nun sacciu cchiù comu l'aiu a taliari  
s'è sempri chidda chi duna curaggiu  
chi nchianta 'i manu mi voli purtari  
o duna cauci pi cumpanaggiu

picchi di tanti si fa rufulari.  
Viatri pappagghiuna chi firriati  
sempru taliannu a idda suspirati  
sa quali razia è chi v'aspittati!  
finiti tutti cu l'ali abbruciati.  
Ma soccu aspettanu chi idda ci duna  
pi tutti un ci può essiri attenzioni  
pi tutti nun c'è mai gloria e fortuna  
masinò si finisci a cunfusionsi,  
nun lu capiscinu ssi gnuculuna?  
E tu puru accumulati addunari  
di tutti chissi chi firriannu ntunnu  
viri cu sunnu i megghiu di pigghiari:  
nta la cartedda vicinu a lu funnu  
frarici cinn'è sempru di ittari.  
Si stu discursu giustu nun ti pari  
secuta sempru a curriri e satari  
siddu chi poi t'avissi a sdirrupari  
arriva u iornu chi t'arripusari.  
Puru chi si appagnata e nfudduta  
la megghiu amica mia sempru tu resti  
si ti trovi straviata o sturduta  
aspettu chi 'na mentri t'arrisetti,  
si torni tu si sempru la me musa  
e sugnu sempru cu li razza aperti.  
Io sempru a tia sugnu affezionatu  
pi nenti mai ti vulissi canciari  
e mi mittissi nautra musa o latu  
chi nun sapissi chi n'avissi a fari.  
Già m'hannu rittu chi la poesia  
finiu e nun sacciu cchiù poetari  
ci arrispunnivi chi aspettu a tia  
chi forsi ti vulissi rifardari,  
si nun mi duni tu l'ispirazioni  
soccu è chi ci putissi mpiattari

a tutti sti picciotti d'a stazioni!  
Sinceru sempri a tia t'a parlatu  
megghiu chi torni a essiri aggarbata  
chi ti mittissi la testa a partitu  
e la finissi d'essiri sbintata.  
Però si iemu avanti di stu passu  
doppu chi ora m'a tinutu arrassu  
mi dispiacissi si t'avissi a diri  
com'a ddu zitu chi sinn'appi a ghiri  
"forti chi tu un mi voi io ti lassu"  
e chi pi sempri ti mannassi a spassu:  
ma lu carattari to nun è chissu  
si resti sula ni provi rimorsu  
ogni cosa nun ti va cchiù a versu  
e si ti chiamu nun è tempu persu.

## ETERNA PICCIUTTANZA

Avivi appena appena vintott'anni  
e ti sarvai du fila di capiddi,  
quannu chi l'anni caminanu avanti  
su sempri biunni sunnu sempri iddi  
mentri chi l'autri addiventanu bianchi,  
si la vicchiaia veni a la to porta  
taliannu a iddi si sempri picciotta.

## AUGURI PI TERESA

Travagghiu sempri u iornu di Natali  
mi veni a trova e na cosa la porta  
pi vuliri stu iornu festeggiari.  
L'ultima vota mi vinni la sciolta  
foru li spinci, mi ficiru mali  
stavota si vulissimu canciari  
li cassateddi m'avissi a purtari  
chi mi facissi megghiu deliziari.  
Ma ogni disiu chi aiu mi fallisci  
mi mettu quattru baci nta sacchetta  
si porta nenti almenu va finisci  
chi unn'arristamu tutti a vucca aperta;  
si nun si trova nenti di mangiari  
a mia un mi pari mancu ch'è Natali.

## AMMITU BUCOLICU

Chiddi chi legginu sta poesia  
di numaru su veru limitati  
su piccaredda comu piaci a mia  
picchi doppu consistinu ammitati  
a sta mangiata di sciampagnaria.  
Siddu viautri siti d'accordu  
appena u tempu accumencia agghiurnari  
e ni livamu li peri d'ammoddu  
tutti sinni emu ncampagna a mangiari  
la primavera già si senti ntornu  
li picciriddi chi ponnu iucari  
la naca attaccu nta la zorba grossa  
cu e chi voli si cci può annacari  
basta chi doppu nun si rumpi l'ossa.  
Cosi fracchi ci sunnu di mangiari  
cu qualchi aliva e na sarda salata  
però si c'è di tutti lu piaciri  
pasta cu l'agghia e sasizza arrustuta  
lu vinu nu purtamu in un valliri  
n'arrinesci na bedda divirtuta.  
Sparti di chissu io vi pozzu dari  
lu suli l'aria fina e la campagna  
lu ciauuru di la terra e di li ciuri  
all'aria aperta pitittu unni manca  
li furchittati s'agghiuttinu suli.  
Pi l'autri cosi v'aviti arrangiari  
cummirità ci su chiddi all'antica  
sulu v'arriccumannu di pinzari



li picciriddi nuzzenti nutrica  
li piruzzi ci aviti a cummigghiari  
si putissi pigghiari na bronchita  
si l'acquazzina vannu a papariari.  
Pi u restu speru sulu chi qualcunu  
m'aiuta quannu c'è di fari focu  
li ligna già su pronti darrè u muru  
pi cucinari io nun sugnu cuocu.  
I fimmini lassatili di latu  
arriposanu e parlanu tra iddi  
di quantu prima hannu travagghiatu  
e amentri si talianu i picciriddi.  
Di tutti chiddi di sta cumpagnia  
chi si presentanu a panza parata  
mittiti a travagghiari comu a mia  
ch'arrinesci na bedda scampagnata  
si ni mittemu tutti in allegria  
semu tranquilli pi tutta a iurnata  
n'addivirtemu cu l'ecologia  
tutti l'impegni e li cosi mportanti  
ci dicemu chi aspettanu pi un ghiornu  
facemu finta chi semu stravacanti  
puliziamuni puru lu contornu  
e nun lasamuni nenti davanti.

## TRIRICI BOTTI

Ogni annu quannu arrivanu li festi  
sutta Natali na simana prima  
n'arruscianu stipendiu e triricina  
chi pi pigghiali ci vonnu li cesti.  
Ni mannanu un vacuni di dinari  
ni cunfunnemu mmezzu a l'abbunanza  
pi un misi semu tutti milionari  
n'annacamu pi darini importanza  
pi na vota ni fannu scapricciari  
nun sennucci strittizzi ne privanza.  
Sta gratificha a niatri tutta sana  
la fannu ancora, mentri la befana  
sinn'iu e nun si vitti cchiù turnari  
li picciriddi un sa ponnu scurdari.  
Pigghi li sordi e li metti a cuntari  
prima li cosi chi su necessari  
di lu munzeddu chi doppu t'arresta  
ci sunnu tutti chiddi cosi extra  
chi t'ha tucatu sempri trascurari  
dunn'è chi un ci hai pututu dari mmesta  
e amentri ti ncumenci a ricriari  
cu tanti sordi ti pari na festa.  
Allura tocchi tutti li buttuna  
debiti mangiari e vestimentu  
televisioni machina e duttura  
circolazioni e rrobbi di mmernu  
ogghiu d'aliva e pranzu di Natali  
luci benzina e riscaldamentu

lu misi longu chi n'amu assuppari  
li sordi ti squagghiaru in un momentu  
a tutti cosi putissi arrivari  
e finissi di stari puvireddu  
si qualchi "sisal" avissi a pighhiari.  
Sti sordi ti parianu na muntagna  
e t'attruvasti ch'un pugu di muschi  
pi spenniri occasioni nun ni manca  
nun t'abbastanu mai chiddi ch'abbuschi.  
Pi l'impiegatu è na vita di stenti  
quann'avi assai ci arresta la saluti  
nta li sacchetti nun ci avi mai nenti  
oppure ci sunnu cammiali scaruti  
li ferrovieri semu abituati  
avi na vita chi semu sbattuti  
nun ci su festi nun ci su nuttati  
a st'ura fessimu tuti arriccuti  
avennu i picciuli chi meritanu  
mali campati e mali arriduciuti  
i stenti nostri a cu ci regalamu?  
Chiddi sperti lu sannu soccu fannu  
la tricesima eru a sturiari  
chi almenu pi na vota tuttu l'annu  
cu stu compensu ni fannu abbivari  
quannu avi a nasciri lu bambineddu  
cu qualchi sordu u putemu aspittari.  
E navota stu iocu arriniscia  
quannu li sordi eranu dinari  
ora pi chiddu chi risulta a mia  
du bambineddi avissiru arrivari  
la tricesima pi raddoppiari  
chi accussi accumulencia a trantulari.  
Ma ormai chi n'attruvamu nta stu mari  
nun si può fari autru chi natari  
e ni putemu sulu augurari

sti iorna cu saluti festeggiari  
e i picciuli beatu cu è chi l'avi.  
Avi un pizzuddu chi io lu capivi  
e puru a viatri vi lu vogghiu diri  
la triricesima ni può durari  
s'è veru fin'o iornu di Natali  
na cosa ancora v'a raccumannari  
nun trascurativi un particolari  
mangiati picca, vi può capitari  
ristari senza picciuli e scattari.

## COMU VENI LA FREVI

Avennu ntisu diri quattru versi  
n'amicu meu di dintra la stazioni  
maravigghiату di comu arrinesci  
rima misura e recitazioni  
mi fici na dumanna d'occasioni,  
cu precisioni sapiri vulia  
di dunni mi vinia sta vintuliata  
mi dissi ha'avutu sempri lagnusia  
com'è chi ora tuttu nta na vota  
ti svampau sta forti poesia?!  
La risposta nun era preparata  
stesi un momentu e ci arriflittivi  
doppu ci detti a siccu na taliata  
dicennuci accusi ci arrispunnivi.  
Fa finta chi tu hai na gran passioni  
chi fussi quasi soprannaturali  
di chiddi chi ti trasi nta lu cori  
chi notti e iornu ti cci fa pinzari  
ti suscita na granni ammirazioni  
e chi di l'occhi un ti la poi livari,  
'na 'stu mentri ti puoi immagginari  
nun sapennu com'è chi ci arrivari  
l'avvilimentu chi ti fa pruvari.  
Sulu la poesia ti può sarvari  
pigghiannutilla comu distrazioni  
facennuti la menti arripusari  
ti sbia e ti servi pi evasioni  
e 'na 'stu mentri t'aiuta a campari.

Li poesì sunnu a tanti maneri  
certi voti si fannu pi finzioni  
ma tanti voti vennu di lu cori  
perciò un faciti li carrabinieri.  
Si c'è qualcunu chi sapi lu iocu  
sapi puru di soccu sta'parlannu  
s'inveci murrinati nta lu focu  
è tempu persu chi ghiti circannu,  
si scrivi quannu na cosa si senti  
ma puru quannu chi un si senti nenti.  
C'è di sapiri chi me nonnu Roccu  
chi io ci portu lu nomi e cugnomi  
era chiamatu lu zu Roccu Sciona  
di li chistiani di tutti ddi zoni  
du Castidduzzu e puru di fora  
era taliatu quasi a paragoni  
comu chi fussi un Danti Alighieri  
chi tantu facili avia paroli  
li sistimava mpustati a doveri  
e li dicia pi tinti e pi boni  
e ci vinianu pesanti e leggeri.  
Perciò tantu chi iemu rutuliannu  
nta li me vini c'è sagnu d'u nannu.  
Ora è lampanti sta situazioni  
e veni facili la spiegazioni:  
quannu ci sunnu cosi d'abbruciari  
lu focu sempri c'è ma è ammucciatu  
e sulamenti si metti a sbampari  
quannu di la faidda è addumatu,  
perciò dicennu lu significatu  
la poesia mi l'aiu purtatu  
dappressu tutt'u tempu ch'a compatu.